

«Այս բոլորի հետևանքով վրաց իշխանութեան տակ ապրող կէս միլիոն հայ ազգաբնակիչները գրկեց ամէն իրաւունքից, նրա պատիւը, ունեցածքը, ազատութիւնն ու գոյքը դարձան միլիցիայի և յատուկ զօրամասի պաշտօնեաների ազատ քմահաճոյքի առարկայ»: «Այն պատրւակով, որ, իբր թէ, Արամեանի շէնքում, ուր Հայ. Ազգ. Խորհրդին կից տեղաւորւած էին և մի շարք ուրիշ հիմնարկութիւններ, կատարւում է կամաւորների արձանագրութիւն յօդուտ Հայաստանի, կնքեցին Հայ. Ազգ. Խորհրդի տոմարները և գրաւեցին նրա բոլոր նիւթական միջոցները և գաղթականներին յատկացւած դեղերն ու դրամները»: Եւ Ազգ. Խորհուրդը փաստօրէն դադարեց գոյութիւն ունենալուց:

«Ահա երկու շաբաթ է, որ Թիֆլիսի հայ բնակչութիւնը ենթակայ է վարչական իշխանութեան ամէն տեսակ կամայականութեանց: Զինւած միլիցիոներները գիշերները այցելում են, առանց հպատակութեան ու դիրքի խտրութեան, հայերի տները, բռնութիւններ են գործ դնում, առնում—տանում են թանգարժէք իրեր, ձերբակալում են ոչ միայն ոչ հայահպատակ, այլ և վրացահպատակ անձանց. ցերեկով շուրջկալներ են կատարում և հայերին հարկւներով քշում են բանտ ու ֆուլթայիսի նահանգը՝ առանց նոյնիսկ հնարաւորութիւն տալու գէթ մնաս—բարեւ ասելու իրենց հարազատներին ու անհրաժեշտ իրեր առնելու. հազարաւոր հայ բանւորներն ու մտաւորականները, որոնց հանում են գործից և ուղարկում Մեթեիս բերդը կամ՝ միջնադարեան բանտերի վատագոյն կարգերով գերիների կայանի վերածւած Ներսիսեան դպրոցի շէնքը — սովորական երեոյթներ են դարձել Թիֆլիսի հայերի կեանքում: Այդ բոլորին զուգընթաց, տեղի են ունենում բոլորովին անմեղ մարդկանց ձերբակալութիւններ՝ դրամ կորցելու նպատակով. մերժման կամ իշխանութեան յայտնելու պարագային սպառնում են զնդակահար անել: Այլասերման աստիճանի մասին կարելի է գաղափար կազմել նրանով, որ միլիցիոներները և յատուկ զօրամասի պաշտօնեաները հաստատուել են փրկագէտի որոշ սակ՝ 50—ից սկսած մինչև 50,000 ռուբլի, և սակաւ չեն դէպքեր, երբ միևնոյն անձին հերթով դիմում ու դրամ են պահանջում երկու հիմնարկութեան ներկայացուցիչներն էլ, և եթէ միամիտը յայտնի, թէ ինքը արդէն տւել է, այդ փաստն ինքնին ամրացնում է նոր պահանջողի իրաւունքը»:

Այս բոլորի թագ ու պսակ եղաւ յունւ. 5—ի ալյանդակ դէպքը, երբ, կնքւած զինադադարից յետոյ արդէն, Թիֆլիսում տեղի ունեցան հայերի զանգւածային ձերբակալութիւններ: «Միլիցիայի գործակալները, գրում էր Վ. Ազգ. Խորհուրդը, վայրենիների պէս, բառիս բուն նշանակութեամբ, որսի ելան հայերի դէմ. մի քանի ժամւայ մէջ ձերբակալեցին 6000 հոգի և ազատ թողին այն մի քանի հարիւր բախտաւորներին, որոնք տեղն ու տեղը, մարդկանց աչքի առջև, կարողանում էին վճարել պահանջւած գումարը կամ, հնարաւորութիւն էին ստանում, միլիցիոներների ուղեկցութեամբ գնալ տուն և աւելի մեծ գումար վճարելով՝ ազատել բռնակալների ձեռքից»:

«Եւ եթէ այս ամենը կատարւում էր Թիֆլիսում, դժւար չէ երևակայել հայերի վիճակը Վրաստանի գաւառներում, որոնք թողնւած են սեփական ճակատագրին և վրաց մամուլի հակահայ քարոզչութեան ոգով սողողւած տեղական վարչութեան ողորմածութեան»:

Անկասկած, գաւառներում, աւելի վատ էր, քան Թիֆլիսում: Ապօրինութիւններից, թալանից ու բանտարկութիւններից դատ այնտեղ տեղի էին ունենում և լլկումներ ու սպանութիւններ, մանաւանդ ժողովրդական